

四庫全書

集部

欽定四庫全書

集部

嵩山集卷一至四

詳校官起居注主事臣顧宗泰

主事臣呂雲棟覆勘

總校官進士臣繆琪

校對官中書臣王家賓

謄錄監生臣朱學濂

謄錄監生臣胡念祖

欽定四庫全書

集部四

嵩山集

別集類三 宋

提要

臣等謹案嵩山集五十四卷宋晁公遯撰公
遯字子西鉅野人公武之弟宋史無傳惟李
心傳朝野雜記中頗引其所著箕山日記一
書而仕履已不可考今按集中上周通判書
題左迪功郎知梁山軍梁山縣尉又程氏經

史閣記稱嘗為涪州軍事判官又與費行之
小簡稱紹興三十年內任施州通判又眉州
到任謝表及謝執政啓則嘗知眉州又答史
梁山啓稱猥從支郡遽按祥刑而集首師璿
序亦稱其為部使者則又嘗擢官提刑而不
詳其地又眉州州學藏書記題乾道年月而
丙戌元夕詩有刺史敢云樂句丙戌為乾道
二年是時正在眉州此集刻於乾道四年蓋

皆眉州以前所作師璿序又稱公遡抱經堂
稿以甲乙分第汗牛充棟此特管中之豹則
其選輯之本也晁氏自迥以來家傳文學幾
於人人有集南渡後則公武兄弟知名公武
郡齋讀書志世稱該博而所著昭德文集已
不可見惟公遡此集僅存王士禎嘗評其詩
謂在無咎叔用之下蓋體格稍卑無復前人
筆力因由一時風會使然而揮灑自如亦尚

能不受羈束至其文章勁氣直達頗有崑崙
歷落之致以視景迂難助諸集猶為不失典
型焉乾隆四十三年五月恭校上

總纂官臣紀昀臣陸錫熊臣孫士毅

總校官臣陸費墀

嵩山集原序

文章之在天下其用至不一而其體亦各不同蓋施於
朝廷者為制誥為章表施於仕塗者為書疏為牋啓被
之金石則為記為銘協於音韻則為詩為賦為楚人之
詞以至立言則為著書紀事則為史筆或嚴或肆或質
或華短長之殊度廣狹之異制奇耦之不齊千彙萬狀
不可窮極觀陸士衡文賦之所列自詩賦而至於奏論
韓退之進學解之所叙自姚姒而至於子雲相如一名

一體莫不皆有律令吁文之變若是其多乎昔之文人其才力聲名固自有大小然求其兼是數者而能之或寡矣故詩如杜少陵而無韻者遂以無傳文如曾南豐而有韻者殆亦不復著也惟東坡先生稱歐陽子以為論大道似韓愈論事似陸贄記事似司馬遷詩賦似李白嗚呼此其為大儒也歟嵩山先生晁公負絕人之資出於內海文章家憑厚而積深發之於文雄深雅健鉅麗俊傑以是擅名聲於時久矣今雖為部使者秉權任

之重猶日論著數千百言凡屬乎文藝不問何等下筆
輒妙天下而皆與古作者合嗚呼天下之文至於公可
謂大備矣吾家傳甫從公游間掇拾其詩文凡一千餘
篇以世之學者爭欲得公所作讀之而恨見之未博也
於是鋟之板以傳焉傳甫以書抵璿曰子於公為門下
士宜為序其首顧璿竊啓何足以與於斯文嘗窺公所
謂抱經堂藁者以甲乙分第汗牛馬而充棟宇傳甫之
所得殆筦中之豹然已足蓋一世矣雖然公豈徒爾哉

以道德治其心以仁義修其身忠以事上公以待物其中浩然方與天地同量宜乎發於事業者既如彼而見於文章者又如此觀公之文者嘗試以是求之乾道四年六月日門生左宣教郎充嘉州州學教授師璿謹序

欽定四庫全書

嵩山集卷一

宋 晁公遡 撰

古賦五首

登賦樓賦

晁子居於硤中已聞西山之可遊蓋武信之美盡在西
山而西山之美無如茲樓已卯之冬歸自益州始及西
山之下而休焉霜露既降天高氣清山川開除氛霧不

興乃從主人問茲樓而登焉四山蒼蒼其峙如屏江流
茫然如帶縈城一目千里野曠川平主人樂之顧客而
喜將以是為東臯每登之而必賦也晁子曰富麗便美
流連光景非今之所謂詩乎世方吹竽伐鼓其門在於
五風不幾於淫如曰山林之樂可以忘歸藻繪巖壑與
之光輝往告市朝殆以為欺曾未加重嗤點隨之主人
亦知言之者無罪聞之者足以戒古者十五國之詩乎
當酒酣而未闌時勞賓而壽主辯者縱談豪者起舞試

為之歌蟋蟀則宴游者無荒而有度也為之歌既醉則
五福可致而六極可去也為之歌七月則有事於農者
識三時之先務也為之歌碩鼠則收養吾父兄子弟者
感動而知懼也為之歌二南則美哉乎如周召之親覩
也於是至而樂之登而賦之其十五國之所詠皆足以
託吾意之所寓凡其鄉人孰不願主人之日遊而喜茲
樓之有補也

屈原宅賦

余入蜀之初嘗至於秭歸之山有漁者過焉指其壚中而告余曰此吾三閭大夫之故居也余聞而異之問途而往觀焉則羣山連綿若遠若近風雲溽瀟不見其境于時秋也霜降氣肅月光益明風林水麓之影相亂而大江之聲若敲金擊石泠泠然其可聽也而所謂屈原之居則無復可識吾想夫牛羊之牧其上而樵蘇之不禁也久矣而彼漁者何自而知耶余觀于屈原之前者有唐叔之苗裔霸主之遺風方示侈于天下築虎祁

之新宮傾四封以來會賀匠氏之奏功其玉帛之容焜
耀於下而環珮之音鏗鏘於中固已為諸侯之雄也自
後彊君桀主日益侈矣東西五里南北千步採玉砂以
瑩礎布金椎以隱路者秦之驪山阿房也壁門鳳闕上
棲金爵繚周牆以百里而終南泰華之氣上下而交錯
者漢之長楊五柞也嘉木崇岡蔽虧杳冥而珍臺閒館
間見層出於幽深者唐之玉華九成也方其作而未毀
固極侈以增麗五都之豪傑足留而目注者彷徨而不

已然而千載之後皆漫滅而不記又況屈原之宅哉自
沈沙之告終凡幾易於星紀觀陵谷之遷變想丘隴其
已毀而後之人猶於荒榛野蔓之間求髣髴於田里而
謂屈原之在是也噫吁悲哉獨何為然豈五方之異俗
惟楚人之為賢秦晉漢唐之址已泯絕而無有至于此
而獨傳考厥俗之所託實祝融之世臣能遺迹於不朽
矧郢中之舊京然今也平原曠野上下禾黍九嶷雲夢
之間水波煙雲之容輪囷浩蕩而瀰漫於九土其章華

之館蘭臺之宮亦不知其處所矣予於是瞻悵久之泣
然流涕而後知名節之可尊而富貴之為不足恃也漁
者聞而笑之曰子真知吾三閭大夫者歟觀此荒蕪尋
常之地豈昔者所以被放逐而不忍去者也聞其始也
漁父語之而不從其終也宋玉招之而不來卒自葬於
魚腹邈神遊於九陔曩云懷乎故都今何不少留而徘徊也余曰封狐雄虺象蟻壺蜂層冰積雪流金鑠石之
域當凜而夏宜燠而冬生于四方為物之凶然吾知其

為異可前備而不逢惟楚國之衆士實同質而異心吾
不量其有毒故見放于江濱然則彼可畏歟此可畏歟
雖漁父之見告使揚其波焉如誦招魂之哀唱亦小智
而大愚所以赴江流而不悔其何愛於弊廬

神女廟賦

漢武帝既封泰山之五年臨朝而歎曰朕念元元之民
未蒙休德周覽中土以施惠澤而南方以遠故獨弗及
也朕甚憫焉是冬詔發飲飛羽林之士簡車騎之衆盛

清道之儀天子御雕玉之輿服龍文而駕魚目繫蒲梢而驟躡雲至于盛唐望九疑登天柱薄樅陽而出休于琅琊天子大悅作盛唐樅陽之詩命協律都尉延年歌之以觴羣臣酒未半天子戚然不懌時東方朔枚舉侍因進曰陛下不懌臣敢請罪帝曰朕適望琅琊之上忽然雲興其氣甚異因感高唐之事聞楚陽臺之山下有神女旦為朝雲暮為行雨朕心慕之異時諸方士嘗言仙者非求人主人主求之乃可致今巡遊天下冀一覩

列仙之屬而莫獲焉殆朕之德不如楚王能有所遇也是以不懌朔跪曰楚王諸侯耳有臣宋玉善為微詞感動神女見夢於王臣嘗笑之王安知神女若臣者乃知之上意乃解命謁者給朔札使為之賦朔即獻辭曰徑西那之綿邈兮積閭風之崇基繚玉墉以千里兮右翠水而左瑤池崑崙層峙以嵯峨兮弱淵周流而逶迤中龜臺之清都兮壇洪敞而甚治粲丹房與玄室兮崑浮雲而上齊諒豐隆列缺之矜工兮斧雷霆而斲之疏懸

黎以代礎兮瑩結綠而飾墀虞淵倒景而下射兮光反
激以交馳萃飛仙之游遨兮餌若英而咀瓊枝夏叢霄
之靈璫兮歌白雲而忘歸狀愉樂而不可殫兮非羽輪
其莫窺帝九靈之少女兮其名曰瑤姬受素書於紫清
兮含洞陰之華滋習玉瑛而厭處兮乘回飈以長辭狂
章大翳為之奉轡兮策蒼虬而駕白蜺馭八景之玉輶
兮曳紛綸之雲旗載靈氣而輕舉兮竭鸞戾而鴻飛涉
巨溟之層波兮予將躡乎南箕聆夢澤之雄爽兮潏天

水之相圍介青丘而澶漫兮奄高唐以冥迷忽意樂而
延佇兮弭絳節以徘徊肱丹笈授夫神禹兮靖九土而
安柔祇下民懷斯遺烈兮即石化而為祠象瓊光之華
闕兮騫辛夷以為楣矯藻棟以垂虹兮列葯房而張薜
帷羣峯連卷而十二兮爛雲屏而揚輝儼玉立而正中
兮貌渥飾而具宜沐蘭澤而含若芳兮被袿裳而繡衣
炯黼黻之豐麗兮澹聯娟之脩眉肅容華之拱侍兮紛
環珮之陸離神武蹲而抱闕兮夕夾陛以文狸元援悲

吟以度曲兮女媧倚歌而舞馮夷三足烏往來為之使
兮訊東華之靈妃迹逍遙乎中區兮亮素節之靡移鼻
祖祝融之裔子兮竊息媯以荆尸蠱文夫人于前兮後
又奪鄖陽子之妻豹舄斃掩而攘內兮蠶目暴竿而蒙
訾黑要挾夏而與居兮於菟盜邨而遂孽世朋淫而上
蒸兮嘗見刺於湘纍橫下臣緊宋玉兮揆暴戾之不可
規稱先王嘗與靈游兮薦枕席而嬖私今胡為而復遇
兮意託諷於微詞啟後世之瞽惑兮誑魄化而為芝曰

媚而服焉兮則與夢期宜聖鑒之孔昭兮獨超悟於昨
非厲皇荒德而慢神兮禍源起乎龍寢悼衛蒯之失國
兮父瑕實發其亂機屏宓妃而却玉女兮幸後王之三
思

暑賦

盛夏之月風緘土壤鬱伏不興陽亢滋驕鑠石流金草
木焦燃氣蒸山冥客有過其主人而告之曰吁可畏哉
暑也吾聞朝歌令質從魏公子浮瓜清泉沈李寒氷嗟

人壽之無幾須富貴其何時南皮之樂僕甚慕之試與
主人觀乎峻函伊闕東西二京平樂畢圭長楊上林高
臺雖毀故基猶存苑多灌叢交映紛披渭濱雒陽彌皋
被隄風來鳴枝影為參差散于平中清清泠泠涼丘爽
塏不煩不蒸則主人亦欲游此耶試又倘佯四方彭蠡
洞庭太湖松江龍淵金隄汨羅瀟湘瀕洞浩瀰周數千
里蛟龍鬱怒水涌波起山谷震動草木盡靡觀者凜然
髮立膽悸則主人亦欲游此耶試又薄游東陸四明會

稽衡廬九疑玉霄赤城高唐峨眉大木千章崇巘百常
含陰翳陽不見日光深林宵冥六月飛霜則主人亦欲
游此耶主人笑曰佚者不視勞崇者不觀庠終身戚戚
何時樂為今夫大農之塵櫛比鉤聯穀稚草壯盡日出
田攜畚耜鍤長後幼先此人適逢綫溜濫觴如驥赴泉
齊魯之交平原廣野黍稷盈疇百里一舍脩途曼曼日
赫如赭車殆人罷汗浹牛馬舉首而望不見尺瓦此人
思得一丘息肩稅駕止咸陽游邯鄲鄭衛溱洧五都之

間迎夏之陽羣女條桑桑柯沃葉密不蔽日炎光下射
膚澤沾溢此人登管蒯之廬意猶自得從軍出戍奉車
挾轂象弭百鈞甲裳三屬荷戈而趨足蹈平陸毒陽中
體炎沙燁目此人幸得休徒止舍以為至足繩樞之子
宅不盈畝外逼闕闕縱步無所行者接武如穴中鼠銜
窠齟齬偏仄環堵中置錡釜煬竈之煙煩寃鬱衝牖
襲戶此人困于煩囂不得動作一見天宇猶以為樂今
吾偃仰一室息交謝客散髮弛帶蕭然終日客猶喔咻

不滿于色豈不過矣哉客無乃貪佚忘勞挾崇棄庠視
我之居若絆若縻僦不得馳我實不然自適其適以休
以息其樂易給故自居此室而暑不我疾也且夫與客
清談相對危坐隱几吾心湛然清若止水屏囂塵其已
除視紛華而不起尚何有於暑哉而當世之士惡寒附
炎焦爛不止弗內省於厥躬徒歸咎於一氣亦甚矣客
起而謝曰僕小人也實不及此

憫孤賦

有衛氏之君子兮鼻祖肇緒於初度靈根大於元莊兮
益植德而垂裕后皇揆其中情兮嘉耿介以作輔綿蟬
連而通籍兮逮五葉之踵武皇考生而審直兮雜若芳
以爲佩中既有此修能兮罹氛濁而不得試服銅墨于
崑邑兮迫滄瀆而繚戾鵬梟迭翔于仞兮鸞畏嚇而增
逝甌窰薦于清府兮倭傀紛其徑侍惟謠詠之妬美兮
君猶天其何懟犬戎忽其吠堯兮肆齟齬猶未果進鉛
刀以禦衝兮衆固知其不可女嬃婉孌而來告兮聖胤

邦而不居昔予棄而今辭兮揆厥禮而弗渝皇考申之
怫鬱兮曰食焉其可捨倚東藩以出奔兮日重趼而百
舍奮大義以委命兮元戎感而就駕前茅蹶于寧陵兮
胡天命之不假獨立而彌厲兮遂結纓于此野夫差悼
于勲闔兮豈忘越之傷指眴盱啜泣于卞隕兮寧蹈敵
以階死余殺身其非難兮實有慕于申子眷欲留此故
都兮懷維桑之攸止矧旆旆而胸關兮宇將顛而藩墜
心怔怔而橫驚兮撰余轡于睢之陽朝發軔而南邁兮

慘去故而盡傷睨帝閣以增遐兮日沈翳其無光岑石
摧其重輅兮豺狼踣夫中路夕惴慄而不寐兮晝徙倚
而環顧察九土之洪曠兮予何為此窘步介淮海之具
區兮幸去危而即安俄魏狸之涉泗兮赤囊翩其若翰
幼遭世之阨艱兮尚童羈而未冠後騶諭之淫噬兮前
大江之奔湍睨鯢淵之赫怒兮柰將進而復止委虎蹊
以顛越兮恐齋恨而永已冒危途以徼福兮寄性命于
一葦陽侯憫予而奔屬兮濟中流之湯湯登句吳之崇

壤兮聊弭節而彷徨
覓愴囊而稍寧兮卜予適其何方
著龜告予以坤維兮盍避世以違害
惟厥土之側陋兮藜藿曼其不採
厭焚亂而願游兮問夫途之所在
歲作噩之杪冬兮霜雪凜其灌漑
絕楚澤之泱泱兮天無風而揚波
陟三峽之峻阪兮陸紆軫而嵯峨
曩予邑於浚都兮安平原之曼衍
絕垠忽其迫隘兮感失徑而悲惋
念世遺予清白兮特繼繼于賓戚
逮煢獨而于役兮適曠野其馬覲
踵尼父之厄陳兮七日慘其不食
寧木蘭

以繼糗兮腹雖潔而愈瘠顏有田以給飢兮陶環堵而
潛伏夫吾塊處無所兮餬予口其不足下鄉困而哀歌
兮微漂母吾其殆曾千金之獲償兮蘭委霜而先敗歲
月怳其遄逝兮視金釵已勝幘豈不懷夫遺烈兮莫盛
於疇昔三歲進而賓興兮非吾宗其誰克豈來者之弗
勵兮降及予而若絕夜慷慨以雪涕兮恨放迹乎窮髮
俗務相之是習兮巫覡以為師聖閭莽其榛塞兮意惘
怳其何之粵予世有舊聞兮退紬繹而覃思嘗俾予

充賦兮求雖獲而忸怩女采薇而驚悸兮終即鹿而有
喜念墜緒之僅續兮撫初志其猶未義捧檄以娛親兮
善干祿之及時三千鍾而不洎兮在子與其益悲矧下
秩之代耕兮蚤顛沛于百罹昊蒼何其不仁兮而畀予
以弱質裹坎毒而豈忘兮懼鞭笞其難必監伍尚之引
決兮曰無愧乎今之人顧毀傷其髮膚兮豈聖言之是
程百年脩其幾何兮徒悵鬱而終身

嵩山集卷一

欽定四庫全書

嵩山集卷二

宋 晁公遡 撰

古詩三十二首

送范道卿赴省試

君之先世真文雄異時奏賦蓬萊宮誰傳副墨過沙漠
至今猶稱長嘯公芝蘭不乏後來秀謂將褻然為舉首
至音澹泊識者寡遂令聲名落廬後北風吹霜日隱山

綵鸞繡襦寧復寒同車西歸信可樂得意自忘行路難
明年春風紫宸仗遙對清光九天上長安花盡君亦歸
緩轡重來一相訪

凌雲寺

問途出青郊踐勝得紺園始登十尋閣敬禮兩足尊仰
觀碧玉螺瑞光發面門飛霞在指端甘泉生耳根屹為
江山壯高揭日月存念此未云大法身滿乾坤東望烏
牛峯突起如伏黿少休白雲亭遠見蒼煙村晴波溢清

輝午樹增重昏方袍無平叔佳處莫與論

中嵒

久聞慈姥嵒今作嵒中遊驚嗟未省見入蜀今白頭松
道夾蕭森石門閉清幽薛字崖壁古蟲書山葉秋突然
起平地劃若三神丘其旁寶瓶峯特立高岑樓錯摩碧
琅玕刻削青琳球周觀劒東西孰得與此侔尊者何方
來杖錫乃肯留乞泉為洗心一飲吾無求尊者默然許
勿忘早歸休

自過隄為山水益佳

客遊三十年不出壑與巴江惡崖石麓十步九褻斜自
過賴里西山水日夕佳冥冥見遠樹渺渺鋪平沙兩岸
何所有鬱鬱皆桑麻良疇散牛羊支流入魚蛇清絕益
可愛豈復憶漢嘉恍如涉荆吳是耶復非耶兒女長硤
中老妻髮已華茲來始及此舉首亦驚嗟

清晨坐堂上

清晨坐堂上文書常滿前皆自公府來徵發何紛然不

聞問養民但聞橫索錢按籍為之課獨求最多年孰知
人困窮豈有力貿遷商不願出途農不願授田居者轉
溝壑行者死道邊此罪在郡縣恩澤壅不宣公府不我
責所貴為貨泉長使貨泉在吏曹同晏然

池上

爛醉高陽池長嘯辟疆園當時自謂樂主人豈無煩方
塘我所有嘉木亦已蕃盛夏每數來天高衆星繁露下
蓮花香風生荷葉翻微月銜林端光照癭藤樽飲之心

為清如洗濁水源念此寧久居行矣駕折轅悽然仰屋
歎千載屹常存閱人猶傳舍過者誰可言

喜張仲景范與蔡仲見過

昔游房相湖乃適與子逢迨其景將入不盡湖所窮今
子聯翩來二難復相從散策破莓苔循池詠芙蓉子勿
謂池小託之檐耳翁名重覺景勝人賢增地雄老夫實
自慶得為使君公飲食玻璃江日汲水一鍾洗我崑崙
心充我雲夢胸中車且少留樂當與子同徑幽木陰茂

土腴蓮實豐凌波挽碧莖剪房剝青蓬吾兄猶在遠按
節臨瀘戎吾亦思飄然攝身乘清風

比與鮮于東之游池上已而辱三詩見示因次

韻

循行脩竹林愛此晚色淨蕭然抱清節每見敢不敬香
聞遙風度陰過微月映渭川游未能吁嗟子方病
好風如高人于世豈求售惟予招則來快出土囊口臨
風弄清冷笑視月在手吾州玻璃江不減蒲萄酒

資州有佳兒賢哉青雲器過我池上游長嘯薄炎熾折
花愛歌紅墮葉輕拾翠風流良不凡可用觀子志

承親戚見過生朝賦此為謝

冠者五六人駕言款吾門是日射蓬矢請壽此山樽吾
方念初生非止祭特豚保母親食我卜士負且言劬勞
曾莫報喪亂乃僅存愧子自遠來戒婦具盤飧草木皆
華滋春事亦嬋媛如欲起我衰豪氣薄乾坤何用酌酒
漿斗柄可手援

外舅衛尉持節於此作盡心堂時與親戚會飲
今三十年予復與衛尉內外屬置酒堂上不減
當時喜賦一詩

衛尉築此堂棟宇真傑立幾容五百坐可飲三千客
府中省文書堂上會親戚金杯浪翻江銅盤光吐日
侍女發清歌華筵美遙夕當時倏分散回首遂陳迹
豈知吾繼來復見少長集雖誠慰濶絕得無感疇昔
在者皆其孫樂極悲且泣歡娛殆不減左右或太息
諒曾事衛尉

始壯今髮白諸郎各勉旃宗族期烜赫

於陵仲子

於陵有仲子築室自躬耕辟糶以為食不肯從其兄而
況區中士欲與並飛纓高節固可嘉由來無復情

桑大夫

漢朝議鹽鐵發言實盈庭赫赫桑大夫官高稱九卿方
幹山海藏難以口舌爭力微不自量可笑茂陵生

羣荷

羣荷翳清瀾不受明月光明月每下照但見露瀼瀼炯
如翠蓋中珠璣爛熒煌我起欲挹之傾瀉入方塘

秋日

秋日淡無光晴雲閒不行空中散白石仰看天宇明時
聞敗葉下撼撼微風生季月當泛菊栽培園中英

幽園

幽園有嘉植盛夏乃繁陰竹節見青眼榴花開赤心樓
高可遐覽地近無遠尋時能卜勝地於此盍朋簪

妻妹師如石同婦見過

古人重生孫欲為王父尸爾姑念爾祖宰木今風悲不
得見爾生況當逆婦歸我獨賀迺翁有婦能奉匭食上
調滑甘寒煖視其宜更致大夫食迺翁喜可知還家勤
五經進德要及時他年懸旌節門戶增光輝

王元才攜家來過有詩見示因簡此作

我思見諸姑正復如父存諸姑不可見豈無若子孫天
涯忽爾逢悲定喜且語惟我之老姑爾之外王母真能

似我家炯然眉宇清閒暇幸數來慰此衰老情今朝攜婦至兒女亦成行富貴各勉旃他時勿相忘

六月五日池上

蒼然暮色來初月光尚微河漢亦不高仰看天四垂衆星一何多粲若天圍碁忽驚毛骨清溽露霑我衣放杯折荷花中有千丈絲織為芙蓉裳可作江湖歸

次韻鮮于晉伯三月病起二首

桃李幾何春已闌雜生薜蘿無與射干永夏碧瓦藏綠暗

涼秋青山吐白團
開花旋見槐著英
解籜忽驚筍成竿

資州無事吾所羨
官居不殊澗谷盤

晉伯時守資州故云

甘雨尚嗇風未闌
只今時清舞舜干
山前四面雲欲淪
松上五鬣露已團
甚憎塵土願投幘
頗思滄浪去持竿
何當共作雞黍社
長者進酒少舉盤

張若虛乃予妻黨湯德翁外孫喜其來賦此

我昔見德翁其人
直且溫共知懷抱
清宜使鄉黨尊竟
無蒲輪召遂葬蒿
里園張子極秀發
乃是外諸孫謹厚

甚似之好修仍寡言功名在少壯簡編勤討論剝觀書
連屋願聞策臨軒方起甯氏宅再興文紀門

眉山史願老秀才遣人寄詩用其韻答之

衰年臨滄江華髮羞照映人憐貌枯槁水與心清淨所
居少席煖況望有屋潤但期牧雞豚那得追駟駿為貧
未歸田投老聊為郡每行芙蓉湖魚躍見於物自欣逢
外平兵未適無刃願從賢者樂俯同農夫慶常令燭或
炙安敢驕且各使君非何武弟子乃樂正陳論翻犀革

宴語對塵柄却思凌雲下亦致賓客盛暇時可數來念此百里近

中嵒文老和予游字韻見寄用韻為報

我雖券內士常思方外游未見夫鐵脚況逢通鑿頭癯然祇樹老隱此陰崖幽脩竹不知夏青松不知秋甚欲効柳子冉溪買西丘又欲追白傳香山尋石樓忽開化人書書中有鳴球其鳴疑飛泉清絕或可侔乃是寄我詩恨我昔莫留觀者勿疵瑕謂以聲音求句法傳叢林

五言如湯休

師伯渾自通義來且出詩一軸為之喜甚奉簡

短作

通義固多賢我昔守此邦不肯入城府私獨敬老龐
今誰念我去帳空列麾幢感子能遠來香醪發春缸
共登煙雨樓相對雲霧牕贈貽詩五字何啻璧一雙
詞源極峻潔石齒漱琮琤驚怪得爾清中有玻璃江

送宇文安行如吳下

往者華陽公熊軾始西還不斷吳松江但取江中山千
崑與萬壑歸置函丈間白雲生宴坐青壁照蒼顏高標
可想見逸駕難追攀公孫喟然歎顧我敢自閑要興故
老家再立清朝班結綬思登畿棄繻行入關嗟予忝父
客送子亦涕潛願謹視風水魚龍多神姦

諸君以詩見壽用師伯渾韻為謝

遠遊天台登玉霄蓬萊仙人宜可招君詩持此為我壽
愛君學問皆富饒有如翠蛟與紫燕穆王畫圖昔曾見

只今豈合地上行霜蹄去曳吳門練老夫惟思雲夢州
煙波渺渺非子愁湖中卉木足驅使歸求橘奴買千頭

張君玉用伯渾韻見示次韻為謝

瞿唐石城干雲霄城中飛書頻見招主公賢似晉重耳
魚如郇瑕地沃饒此行華堂伴清燕退食從容日相見
篇章卷舒文錦繡光彩照映軍組練子寧為官滯一州
不須仰天歌四愁主公早晚登鳳閣子亦牽聯立螭頭
樂敦仁用師伯渾見示句中作禪語禪不可不

領話頭次韻為報

江邊看雲望青霄誰知隔江以扇招機緣句語無可錄
要如芝嶺居上饒鎔鐵作牛石作燕鳴亦不聞飛不見
凜然獨立紈綺中大帛之冠衣大練果能出世去九州
絕意著書為窮愁請來言下辨白黑試觀海頭并藏頭

麥

層雲挾雨來四郊樹木蒼東風吹春促尚帶花藥香年
華不可駐倏見夏日長近傳陵陂麥宿昔青已黃隣舍

思煮餅隔牆聞沸湯里胥忽在門先當輸官倉

三月二十日東山雲蜿蜒而上衆指曰龍也已
而大雨

東山龍起風雨來勢雖暴甚天無雷蜿蜒氣上黑雲合
喧颺浪打蒼崖回千林通體有膏澤四郊晝時無塵埃
舊聞此地亦勝絕夜夜神光如五臺

東山俗
謂金燈

嵩山集卷二

欽定四庫全書

嵩山集卷三

宋 晁公遡 撰

古詩二十四首

湯子才凌雲山用予十四日韻見示且云衛尉
頃登清音載酒二亭口占一聯清音見江來載
酒送江去悵然感之

衛尉余樂廣昔嘗侍蓬萊暮年乃去國持節此徘徊時

登清音亭遙見江西來淒然載酒地復送江東回崔嵬
蒼龍闕白首所仰懷宅相實在傍敬起酌公杯公詩不
敢忘永藏十瓊瑰我慚衛叔寶繼領外行臺每望凌雲
山尚想蓋世才遺聲落崑壑松風有餘哀

范子庚見示長書

百川各分流至海皆同源儻于中道畫潢汙無本根子
今始濫觴如河發崑崙勿作澗溪止當規溟海尊誰謂
水至弱蓋有剛者存批崑仍抉石萬里爭東奔朝來示

我書此意固已原可鄙振也慾奚為丘之門願子更踐
履豈云但知言

正月十四日游凌雲寺

昔賢登茲山逸氣凌清旻誦詩懷太白考易思景純至
今平羗水常浸月半輪追尋所鑿室石古莓苔新後豈
無來者倏忽迹已陳壁間記歲月刻劃如龍鱗自非傳
一世爛若配三辰姓名雖尚存誰復知其人我游方之
外久忘實之賓但飲佛耳泉永洗凡心塵

奉簡湯子和

衛尉女公子始生在開封君來謁衛尉見之文祿中却
後十五載我乃卧廂東與君初會面脩髯鬱垂胸席間
致大斟一舉酒輒空相看每歎息豪氣如元龍今年凌
雲下訪我采蘋宮老妻髮亦白歲月猶轉蓬人生能幾
何羨此江無窮家有百壺泉色作真珠紅飲盡方可歸
廬山正春風

望我峴山作

普賢大開士神足靡不周世人妄指此象馭昔所留願
觀百億身奔走數十州見者喜稱快不見默懷羞紛紛
相矜夸隱晦蓋有由正如官肆赦盡出繫中囚豈其得
預聞皆可除愆尤一方每驚動千乘時往游返為斯民
勞實貽開士憂我師寒山子豐干非同流

師永錫家青神喜紅花堰興作詩因次韻

終歲辛勤農在野邊頭亦聞軍笈舍指揮郡縣催輓輸
兼伐葦蒲收壓柘諸將但思弧矢利教我力耕誰暇議

兵多食少將奈何請君往問司徒銳秦人鑿渠開陌阡
坐臨關東常晏然當時列國豈知此楚王內府藏三錢
何須飛來黃鵠語吾已得於褐之父紅花堰廢今百年
不復秋成頌多稔君看初未作此陂夏無暑雨民怨咨
鋪聲殆合桑林舞千夫斲荒汗如雨道旁笑指堰復興
他日飽食勿忘今

送湯子才如吳下

假裝理蜀柁長嘯下吳天摩挲烏牛石三繫春江船結

綬昨去國力田未逢年初看飛鳥來皆謂令尹賢再看
泥軾歸日謁刺史前抱才宜為邦鬱抑顧莫宣遇合會
有時此行定騰騫聖人坐齋居羣公拱御筵召見渤海
龔拜謝臚句傳歸乘廐吏車五馬應翩翩

謝張文老餉酥

清晨坐堂上忽得故人書近自玉壘州遠餉金城酥聞
由笮都出來與枸醬俱開視靜如練緘題投比珠甚知
故人厚痛中憐老夫豈惟減肺渴兼可濡腸枯因之想

風味更過醅醖醢致此未足言公才可時須似傳滇池
君願獻汗血駒高有八尺龍次有一丈烏論功當作頌
請歌馬斯祖

師永錫少出通義其歸攜伯渾詩來因用其韻
伯渾頃嘗相送至下崑也

益州古建國遠自蠶叢來吾敢怪鼈靈人有化牛哀惟
愛老翁井蘇仙手所開乘輅難少留門前廐吏催愧子
遠相送同把崑下杯至今夢見之石壁青崔巍豈伊四

座客能屈一世才去者不可招至者不可推

閻才元因程伯珍來寄近詩一軸不能盡和用

師淮父韻奉簡

我思買蜀山附田小崢嶸家本冰氏子室無孔方兄為
郡非其樂強顏聊此行四夷幸兵休萬邦喜時平所嗟
啓利源開國始於荆當年惟迂叟乃如魯二生高卧不
肯起彼方事交征共兇自滔天堯舜實聖明至今天下
士語及涕縱橫今王益神武覽奏每歎驚皇皇元首詩

金匱要略卷三
主歌臣則賡德音既屢下美意誰能成追懷符益州積
惡高陵京老農扣頭泣願聞徭役輕故人佐太府因君
煩寄聲艱難念吾土慷慨見深情軟血誓仁義由來蓋
同盟

次韻劉安收惠詩二首

此地冠蓋國古來翰墨場夜看墓頤山上干牛斗光試
酌老翁井尚餘書傳香想其居清華漢閣千步廊大字
寫汗青小楷書硬黃仙去不可追里人祀丞嘗神兮肯

下來冠劔在帝傍作詩遺里人聞者當感傷

耳悅齊王竽莫聽黃桴聲口甘秦人炙莫采首陽苓沈
酣自壯歲昏塞況暮齡誰能悟此理知幾如穆生何須
著胸中雲夢一芥蒂要當空所有為彼亦過計惟思半
嶺雲野老肯分似

勞劉子儀視作紅花堰

冽冽天北風仰視寒雲繁蟄蟲亦坏戶子獨在丘原路
人指此堰嘖嘖相與言堙廢將百年故道今豈存旁有

蔣子池沮如無根源耕者病夏畦擁耒涕潺湲念子不
憚勞塞茅手自掀忽報故道出萬鍾如雷喧堰成爭來
觀矗若干丈垣少壯始從仕功績已可論他時當不朽
名配謝公墩

七月二十日雨中

浮雲淡高天清雨灑廣庭池館颯以涼始知秋氣生蒲
荒葉亂委荷折蓋已傾微風經草木獵獵有寒聲炎蒸
豈得久四時相代更當暑思折膠纖絳不為輕冬復念

裘褐乃與寒暑爭誰能安天運傷哉世上情

喜湯子才永豐築室成

顏子在陋巷端居亦何難家有郭外田足以給一簞今
我客四方衣食於縣官罷則無所歸奔走殊未安聞君
築室成內熱自長嘆近村爭相助老幼常聚觀斲者來
運斤巧者來持鋤經始曾幾時爛然皆艘丹更須執嘉
木竹已青檀樂藩籬護封植勿令牛鬪殘

四月堰水甚小一雨灌田方足

岷江惟清流涇水惟濁泥泥濁禾黍茂流清稭稻宜舊
傳江發源漢涌出沈黎老農望其來未至龍尾西今晨
南山雲翳然忽朝隰滂沱三尺雨泛溢千步隄積潦始
北匯餘波各東颺茫茫黑壤潤戢戢翠剡齊亦復到邑
里溝澮爭交馳往看芙蓉湖微風綠生漪似欲娛使君
豈減習家池老農喜相語歲晚可無饑再拜勾龍社配
我靈星祠更煩請天公膏澤常及時

石季野縣丞見示喜雨詩次韻為謝

驕陽裂厚地沃壤變焦土野老呼蒼天吁嗟擊鼙鼓三
時農甚勞一飽天宜與自慙為刺史封內當鎮撫有災
累其人無德及所部是邦喜譏切相語聞儔侶不作傳
說霖空閔僖公雨敢欺二三子難長數百戶徒知禱神
祇庶望救疾苦如起乖龍卧便覺商羊舞坐令郡兩堰
豈減渠六輔茲晨理衣冠未暇掛神武傷心念疲氓稽
首謝明主豐年必可期甘澤常順序與君俱何幸彼此
德施普

從宋憲登萬景樓

勝地開傑觀大川壯重關使者領我來共此須臾閒王
節照綠野銀瓶落青綸酒酣望八極氣豪吞百蠻俯窺
二江水遠指三峩山遂令蒼茫外盡在顧盼間崔嵬凌
雲寺繚繞含風灣洲渚遞隱見煙霞渺爛斑靜看浮鷗
沒坐數昏鴉還作者必磊落後來莫能攀不減鸛鵲樓
可想熊豹顧下有安樂園惜哉半荆管誰其為起廢歎
息歲方艱

師伯渾自所居東山來賦詩相示用韻酬之

東山鳴鳳在九霄高翔千仞那可招胡為相顧肯下集
竹實醴泉吾用饒春來淘河嚇飛燕泉中老翁誰復見
崇桃炫晝爛明霞穠李照夜舒素練去年念我守此州
樽前歌者有莫愁遙持一盃屬父老日暮仰天搔白頭

范仲芑惠詩次韻為報

吾皇之居玄都秘龍為徽巡虎守衛太顛閔天盡奔走
竇嬰灌夫敢睥睨今年已徵虞公入聖代豈有舜門閉

黃君近在承明庭著作磊落垂一世關子真宜校天祿
文采不減特進麗劉郎聞亦對宣室上陳三宗下七制
子當繼往螭頭立我但願若龜尾曳坐看指日清中原
同與老農歌樂歲

王伯厚和予墻字韻因用其韻記五月八日同
飲池上之作

蜀人工詞賦作者司馬揚其聲中律呂今有房中章顧
嘗評筆力蓋可補詩亡追思每歎息浩歌徒慨慷雖無

銅水池想見金芝芳屬此樂天子徧之署清商是邦故
俎豆夫豈數樂浪能唱襄陽曲不減大隄倡助我飲在
泮慙君並遊梁臨波攬芙蓉翠葉以為觴酌酒滿貯之
如挹白露光放杯且勿遽更當謀樂方左右嗟未省旁
觀猶堵牆

比以酒餉師伯渾辱詩為謝今次韻

荷花為我衣荷葉為我觴白露以為醴濯我冰雪腸念
君在東山宛若天一方想亦能自樂飲菲仍食芳及茲

菰黍節日吉辰甚良笑攬北斗柄安可挹酒漿我有江南春
的皪猶竹光傳呼急走送兩足趺復僵取君池中魚酌此膾
蜀薑遙知快大嚼饕餮子刀如霜

郭中行自漢中寄近詩來奉簡一首

憶始衿袂分十載再相逢於時客益州俱在行李中不暇語
袞袞至今恨匆匆惟昨一麾守其守百乘同乃翁持使節顧
子屬提封君歸問寢門遣書託風通冀君或少留解綬將
往從翻然先我去劃若高飛鴻經行武都

間古來多英雄前弔大耳兒追懷隆準公壞道想流馬
深山埋卧龍試尋所築壇榛荒草蒙茸詠歌意有託嗤
點昔未工才大當盛年氣豪念勇功老夫猶少陵志墮
身亦窮獨思百丈潭俯臨衰病容

喜劉文潛來奉簡短作

吾州橫絕峨嵋陰地勝無復俗塵侵慈姥嵒深不受暑
老翁井寒能洗心子來觸熱可休駕我起呼風令解襟
芙蓉池上更爽塏仰看參天皆茂林

嵩山集卷三

欽定四庫全書

嵩山集卷四

宋 晁公遡 撰

古詩二十三首

喜三十二弟來

吾家全盛時冠蓋靄雲屯上車入華省下車趨里門宗
族百餘人圭璋疊璵璠黃塵暗河洛分散各南奔豫章
老風霜寧有枝葉繁識者猶愛重知為千歲根聞汝居

沈黎鄉黨頗見尊尚蒙五世澤勿鄙三家村當令化箕
子所在誦文元念汝今遠來白首共盤飧會合良亦難
亂離忍復言少留無遽歸同姓可不敦

薛郎遠以頌為壽句法崛竒讀之喜甚賦此為
謝

家藏五世書不減王銅川仕宦雖陸沈文章則蟬聯女
歸逢其良辭來亦粲然胸次適負圖筆端驥奔泉生朝
遠寄我細字書滿牋手追淇澳詩句法兩漢前念昔昌

黎公嘗賦猛虎篇南紀通古學已難與並傳況墮牛李
中百代莫洗前開尊笑謂婦舉酒屬青天愈也殆我愧
庶幾太史遷更看敬夫人叅語東廂邊

簡梁子輔

比報趨魏闕俄從三館游此地非人間清絕乃瀛洲時
應陪羣仙記帝蓬萊丘中有白玉京五城十二樓胡為
憑熊軾復沂巴江流觀者盡驚歎怪子不少留無寧薄
蓬萊顧欲守一州自云見帝所侍御皆和柔始知未鍊

形難與洪崖儔不如在下土為民除瘡疣屬予持漢節
夙夜愧且憂日聞民呻吟蓋甚魚掛鈎幸子為之主其
病往必瘳何由使有邦人人得賢侯

自嘆

巴蜀久彫敝傷哉遠朝廷大道舞狐狸嘉穀困蝗螟我
嘗行其野所在聞惟腥歎息莫能救熟視涕淚零今年
不自意屬當按邦刑平時語云何敢遽忘生靈擬於萬
仞淵撓以一寸筵賢者相告戒安坐看空圖愚者顧之

笑謂我不自寧我非惡靜樂獨行苦伶仃糜費廩中粟
奔走閭前鈴恐如執金椎而誦麥青青果欲中世用諸
公乃儀型

李仁甫除喪作詩問之

閉門讀喪禮荒庭蓬蘢深愁雲聚隴首悲風吹棘心隣
里昨甚憂哭踊恐不任近除二月禪初御五日琴雖復
瘦樂樂衆語喜見今諒其念遺體保此軀千金顧無瘍
可沐髮脫未勝簪稍當理衣冠結綬且正襟渠家符璽

郎實冠翰墨林世業乏潤色詔書行訪尋紬繹須史遷
校讎得劉歆再編中興詩更載庭燎箴暇時侍君側祈
招誦惜惜

中崑長老子文送羅漢松

駐車凌雲山雖在官府中平生著幽禪意與方袍同已
杖菩薩竹更來羅漢松天姿特高潔厚葉非蒙茸銅柯
既天矯玉薤仍青葱上有五百士下笑十八公皆披闥
黎衣如坐浮屠宮勿謂默不語說法聲摩空

劉文潛來

虛亭布雨潤高林來風聲之子適過我氣與秋爭清胸
次冰壺寒舌端河漢傾仰摩玉宇蒼真是金天晶使我
簿書中無復俗氛生惜哉不可留膏車明遂行

與李紹祖劉文潛飲酒

劉子我所敬未嘗言嘯嘯李子我所畏氣豪才有餘自
昔得二子重之比璫璣喜今至是邦乃與二子俱劉子
忽告行具舟下東吳念欲相挽留佐我治文書天臺望

其來交章滿公車李子復繼往刺史親題輿似云日延
佇正此州家須二子古益友終歲可與居一朝捨我去
別淚濕襟裾

觀畫

菰蒲欹倒洲渚生江流茫茫亦清平小舟擊汰如有聲
入眼初覺非丹青便欲從之載酒行忽怪四壁風濤驚

鮮于大任自吳下來比與之飲大任自取毗陵
惠山泉酌之色清而味勝蜀無有也喜賦詩

君從毗陵來載酒與偕行釀以陸子泉可使僮父驚香
味橄欖嚴顏色蒲萄清得非續玉漿無乃挹金莖固應
壓白墮亦未數烏程老夫家巴蜀華髮思南烹飲此惟
恐盡酌之且徐傾君如建吳櫓再見毗陵城相煩送一
車救我枯腸鳴

喜邵孟清見過

爾居泰定山豈減獨樂園但恨山中翁奄忽歸九原我
來不及識風流被後昆見爾眉骨似驚嗟翁尚存借問

昔手植今應茂
牆藩高松垂雨鬣
大竹引霜根
種木在閭里
種德在子孫
家有三絕編
德乃一代尊
閉門勤讀此
勿使絕微言

寄郭信可時假守忠州

君家老阿舒
抗論王公前
盡不託清靜
著書如子玄
愛君識此意
坐脫世糾纏
不復眉炙狂
惟應口談天
近假刺史節
名高黃潁川
無為渠自化
多事豈所便
只今鳴玉溪
百尺來飛泉
秋風木葉下
想見清潺湲
涼波納華

月洗此白璧圓借問掾曹內得無從事賢賞音不易逢
勝景那可捐願因東轅使寄我南樓篇

遠望

山近色未佳山遠看始好我居巴硤內所向苦奔峭清
晨望西南忽盡牂牁徼時於蒼茫外寸岫出林表雲來
翳遙碧眇眇沒飛鳥方知勝絕處畧已領其要何必親
躋攀辛勤事幽討平生謝康樂往來永嘉道此意當未
知躡屐空至老

過陳行之飲

陳郎見我江陽城自起喚婦親庖烹殷勤纖手為袒割
始飲一盃和且平一盃已盡催進酒平頭奴子皆傳聲
幾州春色入此盞陳郎調酒如調羹我家東牀有孫子
亦得從容陪燕喜門前有客不速來笑說今朝動食指
陶然胸次吞渭涇入口豈知醕與醇從茲剩致百家酒
更可作意呼真真

陳行之二年三至寧江嘗有遊吳之興而尚不

果

君如歷塊馬萬里當霜蹄今為繞枝鵲終夕未安棲二
年三見過每至醉似泥我貧觴豆薄飯豆蕪羹藜汲碧
雲雨破擷青風露畦焉能効季倫咄嗟辦薺薺君婦工
烹調刀几勞柔蕘昔嘗留我飯鮮腴出中閨慎勿笑菜
糲平生把鉏犁朝來忽告別復指巴渝西借問王內史
何時游會稽

謝曾子長分餉臨江軍黃雀

遠游旅食荒山裏竹鼠山鷄污刀几鳴鞭走送來扣門
眼明忽見銜環子江南今秋禾黍熟場間啄穗驚不起
正緣一飽墮網羅包裹頭顱行萬里登盤始欣不負腹
下箸未及先染指畧須沃酒助甘腴更覺披綿愈豐美
使我轉憶江湖鄉水珍海錯那可忘十年不見尚能說
楚人未數鯉與魴蛤蜊含漿自有味蟹螯斫雪仍無腸
紅螺為醬勝食肉白蜃作炙如截肪江瑤石首最貴者
千金一枚誰得嘗但願浮家老吳越此生不願尚書郎

入硤行

吾家文物如崔公向來世學工彫龍側理固嘗收會稽
陶泓不獨稱洪農徂徠取煤如點漆宣城東穎能藏鋒
焉知于今一禿翁四寶委棄文房空近時稍稍復尋訪
嗜好亦須隨土風磁洞疏波鑿山骨沙隴別數求毛宗
昌溪萬碓擣白楮沿江千炬焚椅桐不須更問在何記
已作魃叟從巴童但看所有乃如此亦足驗我良羈窮
君不見昔年平御史初得巨璞三硤中少陵酸寒真可

笑欲使起草明光宮

寧江僑人劉生徽宗時以畫供奉翰林中近過
元汝功見其畫甚多皆劉生筆也

劉生待詔蓬萊宮和鉛舐墨稱良工自從八駿狩西極
萬里流落巴山中老來摹寫益神妙指麾草木回春風
時將一幅換斗米千金舊價無由逢漫郎手築江上宅
水鳥山麋森滿壁問君致此何其多答云嗜好今成癖
野人未嘗完袴襦安得絹素充我娛孰知世間皆畫圉

北盡汧隴南衡廬平生長嘯桓將軍客持寒具輒怒嗔
細看粉繪託形似豈若海岱開精神我今丘壑隨所向
崖谷波濤入圖障雲羅霧縠雖可憐幻化紛紛徒自誑
請君閒暇來相從翩然共跨高飛鴻當使真形識五岳
老眼一洗丹青空

曾夔州座右山水圖

華堂左右皆山川登堂一見心茫然松林忽在素壁上
几杖却對陰崖前百年老樹橫高枝正當太古陰雲垂

近前細看纔拱把生氣凜凜如十圍尚想昔年初下筆
指顧江山生咫尺梁棟已受長風吹衣裘若濺洪濤濕
回山倒海不作難此意誰能傳筆端李成骨朽道寧死
況復鄭虔楊契丹吾知此圖未易逢頗思摹寫置座中
鵝溪生綃不難致只恐今世無良工

鮮于大任自東南歸唐安遺予張安國所作水
調歌墨本一軸且云明年復往吳下喜簡作此
去蜀游東吳舉頭望赤霄君之門九重觚稜鬱嵒嵒是

中盛文物簪筆立漢朝規摹覺地雄氣象知天高計其所從客皆是變與臯平生聞張公磊落一世豪示我水調歌奴僕可命騷尚想揮翰時淋漓宮錦袍問子何歸來遠指萬里橋答云懷喬木聊復訪衡茅未嗟功名忤非憚道路勞不見廊廟具乃對簿領曹明年買扁舟鼓枻出下牢西府有故人亦應遣弓招

送李檢法赴夔州任

硤內如播州曠絕誰與隣君昔居其間簿書良苦辛捨

之遂西游五見岷峩春屢為帳下士皆稱席上珍昨聞
乘輅使去作觀國賓雖歌馬離廐肯効鷹著人蹭蹬何
所歸復踏巴渝塵手持太府書仰推明主仁約束狴犴
吏哀矜鱗介民為予語父老今使子國新

送李仁甫被召

天王覽萬事日昃坐承明甚思得奇才指望中原平小
吏與計偕大夫招以旌結綬聯翩來屢聞開邇英少卑
著三館高者登九卿朝廷非不用功業竟何成豈其有

所懷閉口且吞聲豈其有所畏
揆手恐覆羹吾傷風俗
衰視此天下衡莫計事可否
但隨意重輕雖復建良法
因茲無由行念予卧龍底
二年飽躬耕世故已熟觀
見君勿屏營要陳治安策
剴切如賈生願无似揚雄
詞賦稱西京

謝王元才見惠峨嵋山菩薩石

久聞光明山下有太古雪
大冬劇嚴凝厚地愈融結
崢嶸成層冰千歲終不滅
野翁因斲荒得此走城闕
初非

人磨礪真是天剗剗形模如圭長顏色逾玉潔巨細皆
晶瑩表裏俱洞澈或疑普賢化誰得昆吾切太陽一照
曜神光時發越誠宜置宴坐相伴修白業可配寒露壺
清泠濯明月



嵩山集卷四

欽定四庫全書

集部

嵩山集卷八

五至

詳校官起居注主事臣顧宗泰

主事臣呂雲棟覆勘

總校官進士臣繆琪

校對官中書臣王家賓

膳錄監生臣武先派

欽定四庫全書

嵩山集卷五

宋 晁公遡 撰

古詩二十五首

今歲試士竟置酒起文堂延主司且作詩送之
吾州俗近古他邦那得如飲食猶俎豆傭販皆詩書今
年屬賓興詔下喧里閭白袍五千人崛起塞路衢入門
坐試席正冠曳長裾談經慕康成對策擬仲舒吟詩必

二雅作賦規三都傳聞選主司考閱須鴻儒果然提權
衡未嘗謬錙銖得者固驚喜失者亦歡呼鄉黨為歎息
是事蓋久無老守蒙此聲增重西南隅何以為子謝舉
觴挽行車少留盡一醉歸駕且勿驅

次韻楊光父見贈

為善惟不足務德莫如滋古人行此道名與星斗垂是
邦禿鬢翁實乃古醜夷區區豈云難長者能折枝上尋
聲光遠下感風俗衰老夫強解事曲學安所施不見南

海濱舉世誰保持吾言那可用鄉黨笑脫頤但皆指喬
木故園今在茲喬木誠茂美歎息將何為

送杜時可歸太學

宴安不可懷百年能幾何況今五學開皆以禮為羅既
書內舍籍天門近嵯峨云胡久不歸滯留蜀江沱要須
勇一往行即中十科君婦定復賢相敦戒蹉跎暫別德
曜樓勿操子犯戈會看此里閭高車再來過路人笑指
點駟馬金盤陀遠游那足悲所得蓋已多罷酒當就途

執杯聽我歌司業乃父兄養材如菁莪

宇文叔介逆婦歸過通義為置酒遠景樓餞之
夜雨洗綠野平池磨青銅共登百尺樓遂享萬里風遠
自木末來大音中笙鏞盛夏安得此正是飛廉慵為我
解炎蒸舉觴謝天公君行亦快哉輕舟疾歸鴻閨中當
更喜新涼入房櫳可賡白頭吟寫之以絲桐

寄宋嗣宗

蜀江自岷冢流惡及丘原寧止數斗泥乃有千丈渾帝

選高才郎遠來乘輜軒悽然在川上會思澄其源重部
今何如想無風水昏激濁使之清未覺禹功尊我戚閭
丘生短衣方服轅得為經途尉可致薄夫敦何須讀刑
書顧欲多平反但令吏不污信是民無冤

李仁甫和予如字韻詩再用韻寄之

神州久陸沈遂作蛇豕墟諸公頗憤激日上平邊書覽
書帝震怒欲下雷霆誅金城築三洲戈船浮五湖要令
境土復再似祖宗初誰其為民言世獨無郇模師克非

在衆正當戒不虞討論惟甲兵此豈戰所須代思伊尹
相語憶臯陶都皮亡毛安附體肆心自舒正宜詢褐父
難以訪綺襦君今幸得用出駕班輪車為民盡盡言軒
冕真塊蘇區區但投劾何貴於為儒春秋置桀上開卷
一軒渠儻能遵伯禽焉在獲僑如

仁甫有行亦
自劾去之語

羅仲思送伯父以道帖

我家嵩山翁平日慕迂叟斯文到蒼史高節貫白首至
今遺翰墨古意近科斗世人規時好斌媚無不有寧知

虞書渾或笑夏篆醜往年君家尊得此蓋以厚嘗從諸
父游於我實世舊念昔盟可尋與君期不朽

寄洪雅令孫良臣

志士居世間要為鶴鳴皋誰能如羊豕料揀充秦牢吾
邦孫卿子閉門長蓬蒿慨然請治劇不憚簿領勞地雖
百乘小名與九頂高老翁喜相語得見今官曹令行有
盜奔冬煖無兒號君豈求人知知亦未易遭大哉龍伯
國乃欲舉六鼃區區畢吏部竟日把兩螯且當置是事

金匱要略卷五
痛飲讀離騷

卷五

謝張待制赴飲

我如沐猴冠強佩刺史章儻令入朝班驚倒鴛鴦行安
敢延貴人置酒登此堂知公蓋超然軒冕等粃糠但逢
臭味同握手出肺腸肯為宣明面貧賤乃速忘遠從三
峽來欲訪五畝桑聞昨去郡時送者傾城隍皆言民疾
苦公見必慘傷奏疏每建白細書親貼黃豈容廊廟具
而久滯一方使民濟大川行矣為舟航杖屨可少留吉

日辰甚良歌公竹枝詞舉我柏葉觴勿辭飲之醕不發
寬饒狂釀以老翁泉中有班馬香

贈羅仲思仲思今夏來試羣士八月予被朝命
為別試所考試仲思亦來

子初至我邦受命蜀行臺羣士森如林手自揀條枚試
席莫敢譁棘門乃大開知是諍臣鄉所出非凡材益州
外南宮將遣與計偕詔書選主司帝謂汝往哉深喜與
子逢再持釣石來因得享成事笑歌雜詠諧秋風吹帽

帶白露入酒杯飲我玻瓈江
瀉子瓊瑰懷相看語不厭
預憂歸駕催

楊承父與予同在別試所聊戲之奉簡

近時文章衰淺陋亦可憐
走趨王公門書記爭翩翩
開讀令人慙語吃意莫宣
今晨忽驚喜贈我手一編
筆端吐虹霓直上欲干天
樊南甲乙中乃有猗那篇
如聽正始音復回元祐年
借問安能爾氣剛得其全
用為良有司吾實無間然
要知取士公考閱外已傳何由置漢朝

直柄遂當權伏閣日論事不減陽城賢

楊周輔來考試刑法同在別闈剛直士也喜為

賦此

風俗嗟久衰所見皆軟熟今年客益州得此一士足古
來豐鎬都氣壓瀍澗卜豈須和氏璧自有藍田玉琉璃
非不佳炯炯先奪目只堪供把玩彼脆寧受觸愛君堅
重質坐閱世翻覆來試法家流因論廷尉獄張湯善爰
書專亂漢約束何嘗守律令正爾舞桎梏若人甚耿介

不待城旦讀恨我無長風送君騎鴻鵠

題先主廟

天地收霸氣丘原餘閔宮野人相指示旁有若堂封當時大耳兒甚似隆準公夫豈忘故都崎嶇巴蜀中劃然成三分正爾阨兩雄武侯抱遺恨秦隴竟莫通獨憐晉昌明千載時始逢坐看五季亂蕭條河洛空

師永錫餽鹿

麋鹿愛豐草羣行鳴呦呦自謂山林逃可免乃几憂于

人亦何事之死蓋有由所入諒不深竟為羅網求所以
安期生高舉崑崙丘輟食為歎息吾其將遠游

鄉人欲開舊江相勉以詩

鄉人填然來亦有雙眉厖謹言我東堤夏潦所椿撞舊
時水流處沙礫可手扛請開百步洪障以千石砭不令
近城郭庶即回濤龍坐聞南堰民籍籍口語隴深憂堰
或壞他日病此邦二論堅相持誰者肯屈降老夫莫能
決君其問語江

詔除虛額錢計庭遣簡州通判王和叟再至謂
考實未然也人日贈和叟一首

天王念遠民哀此西南隅主者按其籍取之盡鎔銖掃
地皆赤立名獨存版圖竭澤僮未已來年恐無魚明詔
甚寬大宿負當蠲除主者慘不樂何以充輓輸刺史詎
可信殆將有為無遣官視故府姑往考簿書簿書亦難
憑緣絕或欺予不如持明詔却還桑大夫跋涉君徒勞
兩駕泥軼車所幸得一歡莫辭留斯須今晨屬挑菜啗

我園中蔬蔬食君莫笑郡縣誠空虛

予長女歸叔尚偕往江津作詩送之

薛郎吾嬌客昨肯過彭濮相從雖云久一歲如轉燭外
堂忽有請歸駕行當促自稱先君子嗣以病家督焉能
主烝嘗我祭則受福吾誠愛吾女撫視長不足人皆念
其子此事非我獨敢欺泉下友已拱宰上未論情夫何
遠守墓亦所欲老夫懷津鄉山好田土沃尋穿蜂窠破
但種鴉鐵穀先營五畝宅仗爾今往卜

四月十三日池上飲

圓荷受白露可愛池上涼
相將攜筇來羽衣颺飄揚
停觴待明月少焉出西方
澄波照河漢俯仰清茫茫
悠然望高天邀月入我觴
肺肝聊一洗吸此空中光
微風吹芙渠雜以草木香
豈復知有暑踏冰挾飛霜
樂哉且勿歸況乃夜未央
自疑非人間今夕不可忘

白宋瑞自益州和予池上詩來因用韻奉簡

文宗愛夏日殿閣生微涼
高帝思猛士大風雲飛揚
五

子歌洛汭陶唐有冀方誠懸未識此古意墮淼茫我欲
起九原矚以百罰觴作詩豈徒然日月要爭光吾子堪
校讐行翻芸葉香其師縉雲老墓木已三霜有懷不及
展往聽鑾聲典子能償彼恨下泉端不忘

任季明見和池上詩再用韻奉簡且識予拳拳
懷向之萬分也

甘泉洗心清好風吹面涼循池步漣漪澹然波不揚懷
君佳弟兄元方與季方正茲阻會集恍若限渺茫顧欲

煩飛廉為子飄羽觴翔空浮河漢上畧參井光因思從
之去手攀蟾窟香結以飛霜佩衣以袍赤霜俯問夜何
其未及庭燎央自笑乃默存蘧蘧真坐忘

師正二哥正三哥以詩賀雨次韻為謝

漢家用牧守斗酒得西涼聖朝蓋不然事舉或言揚顧
我誤見收分符來一方深知舜門闢遠見禹迹茫春秋
祀百神芒芒降嘉觴昨者為旱禱紫檀燭神光高天忽
飛雨未徹金爐香潤得三日霖稊待九秋霜敬歸慈姥

泉導以旂旄央天功及帝力與爾俱敢忘

復用韻謝湯子才賀雨

亢陽乃為災正坐我德涼有雲輒復散南箕端簸揚舊
聞江都相亦有請雨方星符久未下天意終眇茫齋居
省愆尤客至不敢觴敬開紫函書要近青黎光電鞭煩
列缺雷車呼阿香古人精誠感六月猶降霜夜來僅一
洗高澤未渠央何時來賀我有約君勿忘

送邵仲象如吳下

乃翁昔為校書郎汗簡所載日月光今看太史牛馬走
往見中朝鴛鴦行南公聞名定傾蓋西府念舊當外堂
儻思泰定山下路肯來從我无相忘

地行莫如馬

地行莫如馬蹴踏千里空西游到瑤池豈止過崆峒忽
當涉江漢載之樓船中樓船誰能乘御者須阿童阿童
亦何勞八尺真毛龍即將凌波濤復恐挾雷風或從琴
高生化作赤鯁公徑去不可執飄然朝河宗

病中

莓苔上車轍病客方臥家不知春將歸悵然感年華雨
砌粘落絮風廊走飛花坐久不知倦林梢來暮鴉

嵩山集卷五

欽定四庫全書

嵩山集卷六

宋 晁公遡 撰

古詩十八首

寄太府丞王能甫

君才雄萬夫少也備文武前年有疆事假守在淮浦小
試三里城已可固吾圉諸公職獻納見賢自當舉雖聞
對延英尚屈丞太府近往行約陂四顧多曠土區區張

全義此老安足數河南十八縣髑髏相撐拄猶能披荆
棘著手為摩撫暮年如承平何但興百堵封內我得為
幸梁為之主況今天子聖銳意思復古若人果盡用功
利非小補吾將以是卜日望來告語

今年正月二十五日行園見羣花盡開悵然追
思去年是日去江津縣親戚相送今一歲矣嗟
歎不足情見乎辭

去年別津鄉兩岸麥離離親戚知我行曉出相追隨繫

船五里沙江水清漣漪俯窺皆白石綠色可染衣何以
謝送者呼酒聊共持放杯不忍去看我船解維至今念
其處歲月忽如馳還復見薺麥青青滿陵陂桃李亦盡
開風吹總成泥一歲春一來少留能幾時乃若遠行客
日夜只欲歸正須勤往遊步遶芳菲枝醜渠引微流浮
萍已生池無事但日飲更賦涉園詩

寄瀘南子止兄

二年立王朝忽然厭承明受詔予印綬復作江陽行地

當周五侯秩視漢九卿邊清塵不揚主聖時自平上堂
簪履集出門笳鼓鳴想亦多宴樂鼓瑟兼吹笙吏民更
相戒豈敢煩敲榜田間黃髮叟聞此歎且驚觸眼未嘗
見不毛今亦耕

郡人請開舊江口因往視之而作

大江何時來齧我千步隄居人念水至前年拆鷄棲浸
淫勢未已老圃憂夏畦青青五畝蔬素沙黃卷泥一朝
失此利豈飽鹽與薺紛然向我言有叟其齒齷使君幸

靜聽衆論信可稽去城今幾許坐視埤堦低願移象鼻
東復瀉墓頤西滙為沸白潭不入流丹溪溪名焉敢費使
君畚插各自攜茲事蓋體大更當訪扶犁晨興聊出郊
浮雲渰淒淒徐行見開塞指點了不迷得使負郭民朝
涉無過臍肯辭他日勞遠汲江玻瓈

前起居舍人何資深竹光酒法奇甚近得其法
釀成以餉李仁甫

舊聞蜀酒濃今乃舉此觴可憐如甘言難置烈士腸近

者營糟丘始傳柱下方青菽為麴蘖碧蓼有微芳調和
火齊得泉潔器甚良釀成酌樽中盎盎流瓊漿味勝松
醪春色作竹露光知君却奇溫苦冷卧欲僵五十不致
毀無徹桂與薑強起為我飲季冬天雨霜

贈張文饒

乾坤五十策巧厯莫能算有如鈎其深坐見太極判文
王所以王此道乃一貫即成靈臺附豈畏羨里難自從
商瞿傳訖至子雲贊孰知幽明故但樂文辭玩遂令聖

人情亦同春秋散堂堂張漢州始屈諸侯泮於時抱韋
編迨老識象豕蓋將通晝夜而況談治亂昨初與我言
驚喜每竊歎響應真無窮圖畫皆可按歸看所著書略
已思過半屬今招弓旌盍往執圭瓚冰霜待春融風雨
催歲換宜乘濤瀨平快下赤澤岸朝廷須君來天下疑
以斷

懷淞中兄弟

昔游楚澤窺衡湘飄然欲返川無梁途窮問津西入蜀

十年一過如風狂欲知滯留視草木來時尺許今人長
石龜尚有懷海心苟非達者寧無情倦游于此豈不厭
況乃州縣徒勞人官如敝屣端可捐投劾徑去真欣然
只憂口紋有從理一簪不著死道邊近聞有客自吳至
試問龍化今何年屬車南游今尚爾翠華停停照江水
會稽久闕神禹朝再喜吳兒識天子徑山茗溪兩奇絕
鳳舞龍飛臨觀闕宮中又起白玉城丹樓如霞高嵒嶸
潮聲浩浩江風急越水吳山動秋碧霓旌玉弭有光輝

西湖蒲柳生顏色氣象不與巴山同年來聞此益欲東
但期生見翔鳳闕豈敢望到明光宮舉頭試望長安日
遙想烏衣淚霑臆逢人寄書往問訊流落猶為帝城客
山川雖異風景同勿作楚囚相對泣

單于行

單于連年壓吳壁道路當時多阻隔長安宮殿麋鹿游
目見銅駝在荊棘一龍渡江已升天妖氛夜衝牛斗躔
健兒臨江飲朔馬倉皇捐棄珊瑚鞭蒲萄宮中日復日

長庚食月狼星戢邊馬心思塞草秋吹笳淚落旌裘濕
豈知反覆十五年靈光再見猶歸然落南遺民喜相語
日欲歸理桑麻田平生思歸今得歸未歸悽愴獨先悲
闔廬傷指越未報灌孟陷敵夫空回念昔結纓在何所
遙想荒郊迷隴畝他時抱劒哭野中深目而髯當語汝

王才諒自行朝歸以進士題名示予愴然有感

先朝賜第白玉京五世不出長安城每聞三歲射策罷
諸生盛服趨天庭禁門漏盡開九重闕角髣髴晨光紅

衣冠是日集殿下金支翠旗色相射空雷隱隱車轉轂
鳴梢一聲禁籟肅肅須臾雲開飛六龍皇帝親御蓬萊宮
宮槐滿庭白日長侍臣玉立分兩廂衆星煌煌拱北極
龍顏負宸天中央羽林虎賁擁仗立霜交陞戟摩秋光
天風徐來雉扇舉遙識重瞳似文祖臚傳初罷日當午
起拜君恩謝明主日斜天門隨仗出車馬聯翩動阡陌
金錢賜宴上林苑千花萬草生顏色少年得意凌青雲
路人歎息家人迎昔為兒童親見此當時仰望如天人

豈知生世逢艱難流離憂患尤可憐乘輿巡狩在江表
亮陰三年猶不言詔令蜀都別選士西游彈鋏秋風前
決科偶中太常第意氣豈復如當年臨安太守今為誰
玉宇能刻玻璃碑曲江題名豈料見摩挲墨本心傷悲
楚山聯綿越山遠夢魂不到明光殿一官留滯未得歸
北闕何時眼中見

樂溫道中

路經新峯驛薄暮聊解裝顏垣生秋草庭廡亦已荒北

風吹空林萃萃葉隕廊夜寒不能寐起坐心彷徨出看
天欲明疎星淡無光征夫稍速駕起拂車上霜墟中始
辨道迢遞征途長樹色共空濶晨光尚蒼茫雞鳴始知
村漸覺瞰朝陽青煙出林際滯穗或在場感茲田舍樂
慨然懷故鄉黃金百鎰盡失路徒悲傷

脩竹二首

虛牕倚脩竹陰晴見佳景雨隙落餘滋風櫺亂疎影室
幽境自閒心遠地愈靜丁寧護雲根留伴歲寒永

脩林出夏筍戢戢如牛毛寧亡口腹味所冀逃炎燬露
節半含粉風篁微解苞清陰日夜長會見干雲霄

送鮮于運使西歸

飛鳥避漢節朔風揚旆旌光芒候躔次始見入蜀星父
老喜公至來臨此江濱陽侯為先驅歸指唐安城君恩
解煩劇劒履休殊庭衆聞駟馬還當為故鄉榮眷茲峽
中郡念昔德化深民無暴斂困士感銓衡平自聞有行
色愁雲黯秋陰已應江妃瑟泠然作離聲大江亦安流

不復洪濤驚天水相與碧雲山無限青乃知盛德士扶
持有神明但恨濟世具遽起懷歸心寧無北闕念未忘
東山情君王正仄席漏下開延英如公藉甚久名聞漢
公卿當賜宣室召不但問鬼神金印有斗大錦衣無夜
行願言不俟駕起焉慰蒼生自嗟代舍客蒨緱鬱悲音
久落糠粃後日隨車馬塵不意侍廣座見謂非凡鱗假
之風雷勢欲令化南溟誤當一鶚薦敢冀萬里程獨念
知己難感激爰至今時來或可勉庶隔雲母屏

與鮮于茶幹

吾猶蠹書魚豈能味斯文但以性所嗜頗與黃卷親喜
聞天下言孝章有大名苟得從其游亦足慰此生向來
昌黎翁始獲拜北平俾鸞與峙鵠未見心已傾竭來涪
江上適遇君遠行我窮天所憐特使見異人令聞金石
奏暫破蟋蟀聲相逢已定交遽別寧忘情謫仙不可見
空望江東雲

病中喜李仲霍王子載見過

春風餞餘寒山雨留暝色杜門正卧病俯仰空四壁庭
空鳥雀至牕破風雨入擁爐意無聊胸次百憂集肉消
時撫髀嘯罷空抱膝戶外雲氣昏春泥污阡陌清晨履
聲喧不見車馬迹忽傳高軒過未知當何適僕夫走告
予有客來問疾起迎屐齒折頗覺心悅懌沈痾脫去體
陽氣滿大宅坐聞枚叟言汗復漉然出平身拙自衛外
邪屢見襲肯嘗倦賓至束帶難自力今者乃不然惟恐
歸騎急向來謝交游正乏君輩客

涪川寄蒲舜美桐煙墨來試之良佳因成長句
西風吹林秋日白脩桐葉彫實寒碧霜餘結實鳳不至
野人取之出膏液山中老翁頗喜事買膏燃光歸照室
旋收輕煤下玉杵陰房掩翳煙不出澤麋解角麝薦香
嚴冬折膠天與力律灰吹盡無裂文外乾中堅介如石
故人憐我貧嗜書遺我一丸欣有得空堂無風塵亦靜
朝陽壓牕書繞壁起臨墨池洗硯試入手已怪光奪漆
蒼忙忽驚玄雲晦卷霧頓失寒松色徐嗟流落用失所

翰墨何由有勲績從軍豪氣吾豈能倚馬翩翩磨楯墨
傍人笑言君勿疑著書固屬窮愁客

送宋秀實罷官歸將有東南之行

遑遑魯東丘結友得聃耳兩家千歲後尚復通爵里況
予與先世相去百年邇常恨會面難此意恐遂已豈期
官紵溪君為幕下士不但見典型自喜聞正始獨嗟瓦
礫後不遑蒹葭倚遽聞北海薦當為東山起春風洞庭
波九澤彌空水掛帆下中流千里一日爾東南即王都

分野乃星紀宮殿芙蓉旗玉佩白雲委麒麟翳鳳皇侍
輦參劔履當知帝所樂顧非俗吏比良圖宜早遂力行
無遽止今朝離亭柳顏色已可喜欲君早著鞭折贈當
馬箠

送譚廷碩司戶歸魚復

平生惜芳辰每負止酒詩不量井楣鉗安得如鷓夷果
中麴藥毒抱病悔可追雖無腐腸憂乃有椿喉危晚聞
倉曹掾巾車欲東歸此君吾畏友議論可質疑相從未

云久白首已可期莫陪諸公後往聽陽關詞羸然卧空
舍不得一語離心旌無終薄日夕風中飛戶外雨連晝
水聲已鳴溪行雲候歸蓋花塵漲春泥人知鄉閭近自
忘車馬疲似聞五畝宅止居灤東西傾倒稷下學歡呼
里中兒嗟予久去國流落天一涯因君返枌榆慘然起
遐思不惟消魂苦益增游子悲

嵩山集卷六

欽定四庫全書

嵩山集卷七

宋 晁公遡 撰

古詩一十八首

得東南書報亂後東都故居猶存而州北松檟
亦無毀者

旄頭光垂北風起黃沙漫漫暗天地翠華清曉巡朔方
咸陽宮殿生荆杞健兒解鞍留漢土凝碧池頭日歌舞

一朝忽棄洪河南來歸輿圖丞相府當初亂離誰料此
南北中分指淮水天睽地隔十五年不知中原復何似
至今兵罷闕泥開始有北客中原來歷言王侯故第宅
瓦礫半在高臺摧最憐長楊與宣曲樹木荒涼迷御宿
上林苑廢花自開輦路春回草還綠宮中千門萬戶空
獸扉凝塵生網蟲遺民相對向天泣耳冷不聞長樂鐘
外城白晝無人行當道往往狐狸鳴天陰日暮聞鬼哭
萬家經亂今一存嗚呼上帝白玉京繁華掃地令人驚

此生復識太平象不及百年終未能世人寧有金石堅
定恐不見全盛年出門恍惚忘南北故國何在山連天
豈意揚雄一區宅城破蕭條尚如昔閉門風雨長蓬蒿
榱桷多年亦傾側戶牖尚帶沙場塵小兒猶學金笳聲
四隣半已易新主存者無復當時人城北淒涼九原路
往往停車不忍去幸無樵牧犯松柏那有鮮卑護置墓
春風冢木生蒼煙北望拜泣還欣然向來艱難誰得免
獨我獲此真天憐君不見開成相國玉杯第甘露變興

巢亦毀又不見驪山築墳葬祖龍牧兒盜入焚其中儒
生慮遠無後憂生居敝廬死山丘五世相傳蓋有道中
無所欲人何求邇來天涯倦為客角巾行卜東歸日里
中耆舊今已無忍聽隣人更吹笛

尉廨無隙地不能蒔花竹之屬惟廳事前舊有
柳一株予憐其獨也增植其七焉暮春之月大
有生意可喜為賦此

千林春入花梢紅空庭無樹來東風手栽楊柳三尺許

芳意已在萌芽中官居難期十年木聊爾移根伴幽獨
雨催細葉相續生眉峯為誰出脩綠君不見美人夢中
春日長翠簾風開捲春光饑寒病叟寧有此蒼苔破封
對作行游絲飛空日停午乳燕巢成寂無語柔條作陰
未覆庭影立東風不能舞明年我亦未成歸會見裊裊
生新枝清陰漸滿搖落日度曲無力弓蠻垂人生於世
無定著身與楊花共飄泊他年莫忘桓將軍漢南重來
看搖落

晝寢

官曹無人吏休沐杜門謝病車脫軸門前經旬客不至
苔色侵堦春更綠書堂蕭然白日靜黃蜂收聲蜜蜂足
楊花浩蕩天無風簷端三丈朝陽紅晴薰病眼煖欲醉
卧搔短髮如飛蓬枕書睡熟呼不醒黃梁正飯邯鄲翁
不知紛紜夢幾許覺來煙際聞昏鐘

平都山硤中勝處余思欲一到而不能近得予
弟書云今歲仲春嘗與外兄孫長文順流往遊

焉聞之不勝悵然

沙痕夜漲春流生微風不起波紋平雲間眩轉失煙樹
輕舟直下鳬鷗驚櫓聲欲出含風灣舟人已指平都山
仙宮無人鎖春日蒼煙漠漠松聲寒謫仙宿天上寥廓
三百年來無此樂知君此游殆奇絕破中山川豈云惡
昔年相期欲同往流落空山阻清賞興公雖不見天台
執筆猶能寄遐想

恭南道中有感

西風夜驚林木葉下寒浦大江未收潦黃流尚奔注起
看曙光開忽已暗煙霧靄靄空谷雲冥冥秋江雨昏霾
天際山暝入雲間樹跳波亂沸白行旅皆斷渡沉復悲
遠行扶疾在道路嚴程不可緩端為斗米誤有田儻可
歸破甑誰復顧

雨中

冥冥雨脚來巖谷生暝色大江失洲渚隱起煙霧白微
茫沙邊樹坐覺雲氣隔霖霖已經時初不見天日城中

三尺泥陌上無轍迹秋田穫無時農父相對泣各言迫
軍輸督責甚峻急今晨忽晴霽曉日照屋壁吾饑行可
療庶食明年麥

凝香堂

訟庭鞠茂草園扉生網蟲政成胡不樂酒肴可從容人
云倡優拙公在宴寢中翰墨以自娛落紙驚游龍壁間
三大字筆畫元自工焚香日清坐未覺塵事蒙牕虛度
清光簾疎捲秋風隱几衆山碧題詩秋葉紅脩篁發清

籟為公奏笙鏞坐客憮然笑此興誰能同但聞太守樂
焉知清靜功

有客自關外來頗道邊亭暴露之苦時子止兄
方趨原上予因感而有作

平涼軟血不濡齒奚車麟麟臨渭水一丸未及封函關
已復酣歌飲都市近聞移屯集岐下戰聲日震長平瓦
兩軍相持久未決將軍寶帳皆在野野田秋深風力勁
邊雲日滿青泥嶺三軍雨立甲裳重諸將露宿旃裘冷

原頭霜落黃蘆乾西風獵獵邊亭寒從軍之樂今有幾
仲宣寄詩煩說似

題趙誠甫養恬軒

本朝流澤長後世多宗英故老稱先王往往如咸平及
見後來秀亦皆有典刑辟疆好清靜雖仕不近名每笑
黃須兒鞍馬勤遠征功成不過侯彈雀良自輕養恬一
室內尤見避世情帝欲睦其族賜祿恩甚榮不煩親指
呼卧護鈴下兵優游有餘樂軒牕亦虛明客來願置醴

庶無忘穆生

遊仙都山

松環樓殿青江遶石壁流清波天讓碧月照無邊秋風
景自清好江山難獨遊舉觴聊一醉放懷忘百憂

早起

晨煙生遠山空翠蒙餘昏天容頗不佳北風淒以寒醉
眠擁敗絮方知有奇溫夢餘忽驚悟簷有鬬鵲喧

冬暮

風林委黃葉寒鳥噪枯枝四山失其蔽慘淡無奇姿是
時歲云暮節物良可悲邊馬嘶北風塞垣草亦衰傳聞
西南戍未敢休王師不辭征行苦頗念餽餉遲遙憐持
戟士半是五陵兒不知家存亡辛苦臨邊陲日暮裘褐
單誰當寄征衣

歲晏

歲晏天益寒短景殊未長曉日出愈遲翳翳迷扶桑微
陽不破霧鬢鬚光有芒開門視屋瓦北風吹朝霜起坐

擁寒爐束帶指已僵灰中見宿火晶熒無餘光天寒不可出墜戶宜深藏朝衙不敢後歛板趨公堂歸來日正出臨堦負朝陽茲晨暫自適明朝殊未央

天寒

樹頭謾謾風聲來木葉已盡吹黃埃是時霜飛萬瓦白
曉霧欲破晨光開嚴天禦寒惟酒可急喚江南鸚鵡盃
一盃未盡醉色起紅入兩頰驚春回惟愁見守不少貸
酒力未解還相催遙瞻浮雲蔽北極故鄉何在心悠哉

茂陵先帝儻見夢敢不奏記通天臺

子兼行後一日作

平生每臨岐輒作數日惡況當暮冬際尤用感離索千
林已空枝饑鳥晚猶啄北風殊未已槭槭卷黃落想當
道里遠窈窕復尋壑霜寒清夜驛月樹墮驚鵲僕夫睡
已熟獨坐誰與樂寄詩往問之聊以慰寂寞

馮萬州當可以洞庭春色遺王子載蓋用安定
郡王遺法也子載招予飲為賦之

秋風洞庭波霜落洲渚出黃蘆半傾倒江樹無復色獨
餘千木奴后皇所嘉植芳辛有餘味不減玉笋漑可令
披黃苞以甘授歡伯釀成無邊春吞此雲夢澤猶持陶
家輪斷取李衡宅納之甕盎中未覺宇宙窄方當玉腴
熟溜溜糟床滴尚帶含霜容未飲香滿室味奪桑落醇
色輕蒲萄碧夷考無前聞疇能妙儀狄流傳自王家遺
法後世得不宜博涼州時可餉賓客輟餐茗戰罷持用
解水厄

飲兵厨羔羊酒

沙晴草軟羔羊肥玉肪與酒還相宜鸞刀薦味下麴蘖
釀久骨醉凝浮脂朝來清香發甕面起視線漲微生漪
入杯無聲瀉重碧僅得一醉夫何為君不見先王作誥
已刺譏後來為此尤可悲

樂溫舟中作

密雲卷雨歸空山暮林接翅昏鴉還須臾水面明月出
滄江萬頃瑠璃寒波平汗漫天無風水光月色相為容

臨流愛此無盡碧乘月直下滄浪中江心石出高崔嵬
水作鏡面無停埃琉璃萬頃忽破碎知是一葦橫江來
中流與月更媚嫵湛湛無聲翠光舞飄然長嘯順流下
擢夫請留恐仙去姑令結纜寒沙邊月方正中光入船
洗杯索酒屬明月今夕之樂寧非天

嵩山集卷七